



DEPUTACIÓN PROVINCIAL
A CORUÑA

SERVIZO DE PATRIMONIO E CONTRATACIÓN



CONCELLO DE RIANXO

Número 48 /2019

CONVENIO DE COLABORACIÓN ENTRE A DEPUTACIÓN DA CORUÑA E O CONCELLO DE RIANXO PARA COFINANCIAR UN PROXECTO DE RESIDENCIAS DE ESCRITORAS/ES E PENSADORAS/ES EN RIANXO DURANTE O ANO 2019

Na Coruña a 15 de maio de 2019.

REÚNENSE

Dunha parte Dona Goretti Sanmartín Rei, Deputada de Cultura e Normalización Lingüística, en virtude da resolución da Presidencia núm. 29081, do 23 de decembro de 2015, pola que se lle delega a competencia para asinar convenios da súa área en representación da Deputación Provincial da Coruña.

E da outra, Adolfo Francisco Muíños Sánchez, Alcalde Presidente do Concello de Rianxo,

As partes teñen plena capacidade para levaren adiante este convenio e,

MANIFESTAN

1. O concello de Rianxo e a Deputación Provincial da Coruña teñen interese en desenvolver un Proxecto de residencias de escritoras/es e pensadoras/es que se realizarán en Rianxo, nunha casa situada na aldea de Brión. Para seleccionar ás cinco persoas residentes farase unha convocatoria enfocada en escritoras e tamén en pensadoras, dous conceptos distintos pero concentrados no mesmo: elaboración persoal, por parte das persoas en residencia, do seu traballo creador e intelectual.

Para o ano 2019 contéplase a realización de cinco residencias. Tres persoas residentes para a tempada estival (de xullo e setembro) e dúas na tempada de outono (de novembro a decembro). Seleccionarase a cinco persoas en residencia nese tempo, pero este reparto inicial entre as dúas tempadas poderá variar dependendo das solicitudes que se presenten e da selección final.

2. As persoas elixidas pasarán o tempo aproximado dun mes de estadía na casa, situada nun contexto rural idóneo para o traballo intelectual e creativo, en estreita relación coa comunidade das persoas que viven na aldea. A estancia da persoa residente é gratuíta e esta comprométese a pagar simbolicamente a súa estancia de retiro creador ofrecendo un seminario de pensamento ou obradoiro de escrita creativa no contexto do Concello de Rianxo.

O seminario ou obradoiro a realizar polas persoas residentes terá unha duración mínima de 3 días e a inscrición é de balde para calquera persoa interesada, tanto do concello coma de fóra do mesmo. Igualmente, as persoas en residencia ofrecerán tamén unha conferencia, recital, conversa pública ou intervención artística, en outros concellos da provincia da Coruña.

3. A Deputación da Coruña ten asignadas entre as súas competencias a organización de actividades que teñan por finalidade o fomento en materia de cultura, en virtude do art. 118.d) da Lei 5/1997, de 22 de xullo, de Administración local de Galicia.

4. Neste contexto, a Deputación da Coruña está interesada en colaborar co concello de Rianxo no desenvolvemento destas residencias de escritoras/es e pensadoras/es.

5. Que, en virtude das consideracións anteriores, a Deputación da Coruña e o Concello de Rianxo acordan suscribir o presente convenio de colaboración dacordo coas seguintes

CLÁUSULAS

PRIMEIRA.- Obxecto

O obxecto deste convenio é cofinanciar o desenvolvemento dun Proxecto de residencias de escritoras/es e pensadoras/es en Rianxo durante o ano 2019.

SEGUNDA.- Obrigas das partes.

Para acadar a finalidade expresada na cláusula anterior, as partes representadas comprométese nas seguintes actuacións:

a. CONCELLO DE RIANXO:

- Ceder os espazos propios necesarios para a realización das actividades e achegar todos os materiais precisos para a realización das actividades obxecto do proxecto.
- Aboar os gastos de mantemento da residencia como espazo físico, por importe máximo de 2.200 €. Estes gastos comprenderán o alugueiro da casa nos meses da residencia e os gastos de subministracións.
- Nomear un representante no comité de selección do proxecto de residencias.
- Facer constar a colaboración da Deputación en toda a publicidade se realice das actividades relacionadas co proxecto.

b. DEPUTACIÓN DA CORUÑA:

- Realizar a convocatoria do proxecto de residencias e nomear o comité de selección, que estará presidido pola deputada presidenta da Comisión de Cultura e Normalización Lingüística e estará composto por unha persoa representante do concello de Rianxo e dúas persoas de reconocido prestixio no mundo da cultura.
- Aboar os gastos das cinco persoas seleccionadas como residentes, por importe máximo de 3.000 €. Estes gastos comprenderán a manutención e os desprazamentos necesarios para as actividades obxecto da residencia.
- Contratar a xestión e coordinación do proceso de selección das residencias, a atención aos residentes e o desenvolvemento dos seminarios, obradoiros e demais actividades nas que participen os residentes, por importe máximo de 8.000 €.

TERCEIRA.- Financiamento.

A Deputación da Coruña contribuirá á financiación do proxecto cunha achega máxima de **11.000 €**, tal e como se indica na cláusula segunda. Este importe imputarase á aplicación orzamentaria 0612.3341.22609 do Orzamento do ano 2019.

CUARTA.- Xustificación.

O concello de Rianxo acreditará o cumprimento das obrigas asumidas na cláusula segunda, mediante a achega dunha certificación acreditativa do pago dos gastos de mantemento da residencia como espazo físico e de documentos nos que conste a publicidade da colaboración da Deputación.

A Deputación acreditará o pago dos gastos de manutención e desprazamentos das cinco persoas seleccionadas como residentes, por importe máximo de 3.000 €. Estes gastos aboaranse previa presentación de facturas.

A Deputación acreditará o pago correspondente á contratación da xestión e coordinación do proceso de selección das residencias, a atención aos residentes e o desenvolvemento dos seminarios, obradoiros e demais actividades nas que participen os residentes, por importe máximo de 8.000 €, de conformidade co disposto no prego do contrato.

QUINTA.- Causas de resolución.

O incumprimento de calquera das cláusulas deste convenio constituirá causa suficiente para a súa rescisión.

SEXTA.- Xurisdición.

Será de aplicación a Lei 40/2015, do 1 de outubro, de réxime xurídico do sector público. Este convenio ten natureza administrativa. A xurisdición contencioso-administrativa será a competente para o coñecemento de posibles cuestión litixiosas que poidan suscitarse como consecuencia del.

SÉTIMA.- Vixencia.

O período de vixencia deste convenio será dende a súa sinatura e ata o 31 de decembro de 2019.

Este convenio obriga ás partes que o asinan ao seu cumprimento, e sométense ao acordado en todas as cláusulas.

O PRESIDENTE DA DEPUTACIÓN PROVINCIAL DA CORUÑA,
PD. Deputada de Cultura e Normalización Lingüística

O ALCALDE PRESIDENTE DO CONCELLO DE RIANXO

Asdo.: Dona Goretti Sanmartín Rei

Asdo.: Adolfo Francisco Muíños Sánchez

O SECRETARIO XERAL
DA DEPUTACIÓN PROVINCIAL DA CORUÑA

Asdo. José Luis Almau Supervía